

Folkehøjskolet pillugit oqallinnissamik siunnersuut. Folkehøjskolinik siunnerfinnik isumaliuutersuutit toqqammavigalugit folkehøjskolet ingerlatsiinnarnissaat anguniarlugu politikikkut qanoq ikorfartuisinnaavugut? Politikikkut iliuusissat suut aqqutigalugit tunngaviusumik periusissatut toqqammavissat ersarinnerusut qanoq suliniutissat ingerlanneqarsinnaappat, tamatumani folkehøjskolenik isumaliuutersuutinik toqqammaveqarnerit anersaakkut tunngaviusut qaffassarneqarsinnaappat?

(Inatsisartunut ilaasortaq, Sara Olsvig, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut Ilaasortaq)

Naalakkersuisut paasinninnerat naapertorlugu højskolit maanna inatsit atuuttoq naapertorlugu marlunnik suliassaqarfeqarsinnaapput. Højskolit nalinginnaasutut ingerlatsisussaataapput suliassamullu tassunga Namminersorlutik Oqartussanit 6. mio. koruuninik højskolit marluusut immikkut taperneqartarput. Aningaasaliissutinut taakkununga piumasaaqat naammassisassaq pingaarneq tassaavoq ukioq naallugu højskolertunik 20-nik atuartitsisoqarnissaa.

Taassuma saniatigut allanik isumaqatigiissuteqarnikkut højskolit ilinniakkanik allanik ingerlatsisusinnaapput.

2010-mi Inatsisartut Folkehøjskolit pillugit inatsit nutartigaq akuersissutigaat ilaatigut højskolit innuttaasut nalinginnaasumik ilinniarsimassusaannik qaffassaaniarluni suliniarnernut peqataatinneqarnerussasut kissaatigineqarmat kiisalu nunatsinni ilinniarfissatigut piginnaangorsarfissatigullu periarfissanik amerlisaaniartoqarmat toqqagassaqarnerunissarlu anguniagaammat.

Inatsisip 2010-mi akuerineqarnissaa tikillugu højskolit nalinginnaasumik peroriartuutaasunik sammisaqartitsisussaannermik saniatigut, assersuutigalugu ilinniakkanut suliffeqalernissamulluunniit ingerlaqqissutaasinnaasunik pisinnaatitsilerfiusumik, taamaallaat meeqqat aturfiani inaarutaasumik misilitsinnerit qaffaseqataannik neqerooruteqarsinnaataapput. Taamaalluni siunertarineqarpoq piginnaangorsarnissamut ilinniagaqarnissamullu pisariaqartit ilinniarnissamut periarfissat piusut naammassisinnaangikkaangitigut højskolit taakkununga tapertaasinnalernerit.

Naalakkersuisuni illersugarilluinnarparput højskolit suliffeqarfittut kiffaanngissuseqartutut pituttorsimangitsutullu sapinngisaq naapertorlugu perorsaariaatsiminnik, suleriaatsiminnik, atuartitseriaatsiminnik minnerunngitsumillu sullitassaminnik toqqaasarnermikkut akuleruffigineqaratik suli ingerlatsinissaat. Højskoleqarneq taamaammat immiini atuartitseriaasaavoq asseqanngitsoq isumarpullu malillugu kiffaanngissuseqarnerata aamma nammineq aalajangiisinnaanerata namminersortuuneratalu piujuarnissaa pissutissaqarluartippaa.

Naalakkersuisut isumaqarput inatsisit ullumikkut atuuttut højskolit kiffaanngissuseqartumik, patajaatsumik ullutsinnullu tulluuttumik annertuutigut namminneq ingerlatsinissaannut

periarfissikkaat. Inatsit kulturimik, kinaassutsimik inuttullu ineriartornermik aallussiviusumik nalinginnaanerumik peroriartuutaasumik højskolernissamut periarfissiivoq ilutigitillugulu assersuutigalugu ilinniartinnik allanik ilinniartitsinernik piginnaasaqalissutaasunik ingerlatsisunik suleqateqarnikkut sammisanik allanik aallartitsisoqarsinnaalluni, tassunga ilaatinneqarlutik arlariinnik qaffasissuseqartunik atuartitsinerit misilitsinnissamut soraarummeernissamullu piareersarfiusut.

Aningaasaqarnermut atatillugu Naalakkersuisut nalilerpaat, Folkehøjskolit ilinniakkanut allanut inatsisillu minnerpaaffissaliuussaanut sanilliullugit pitsaalluinnartunik atugassaqaartinneqartut. Højskolinut tapiissutigineqartartut efterskolinut ingerlatsinikkut assingusumik nunatsinni ingerlariaaseqartunut assersuutitut sanilliunneqarsinnaapput.

2016-imut Aningaasanut Inatsisissamut siunnersuummi højskolit tamarmik immikkut ikinnerpaamik atuartunik 20-nik ukiumi ilivitsumi atuartitsinissamut 6,1 mio. koruuninik aningaasaliiffigineqarput. Tamanna ukiumi ilivitsumi atuartumut ataatsimut inatsisip minnerpaaffissaliuussai malinnerisigut 305.000 koruuniuvoq.

Tassunga sanilliullugu Efterskoli Villads Villadseni 80-inik ukiumi ilivitsumi atuartoqartoq Namminersorlutik oqartussanit 11 mio. kr. ataatilaarlugit aningaasaliiffigineqartarpoq. Ukioq naallugu atuartumut ataatsimut akip taamaasilluni 137.000 koruunit missiliorpai. Malugineqassaaq angajoqqaat efterskolertuuteqarnermut akiliutaat kommunilluunniit højskolernermut akiliutaat ilinniagaqarnerisutilluunniit naatsersuinerimut ilaatinneqanngimmata, taakkuali assiliaq tamakkiisoq allanngortingaanngilaa.

Ilutigitillugu oqaatigineqassaaq højskolip ukioq naallugu atuartut 20-t sinnerlugit tigusassallugit toqqarsinnaammagu taamaalilluni atuartumut ataatsimut aningaasartuutaasoq 305.000 kr. ataassinnaallugu. Højskolilli nammineerluni toqqagassaraa inatsisip minnerpaaffissatut piumasaqaataanik amerlanerusunik atuartuuteqassanerluni. Taamaattumik Naalakkersuisut isumaliutigisassaqqissoraat maannakkut aningaasaqarnikkut ilusiliisimaneq – tassa tunngaviusumik aningaasaliisaarneq qaffasilluni, tunngaviusumik taperneqarnissamut piumasaqaatit appasillutik annertunerusunilli suliaqarnikkut taartisiaqarfiunani - ilumut inuiaqatigiit pisariaqartitaannut tapersersuisuunersoq.

Apeqquq højskolinut aningaasaqarnikkut ilusiliisimanermut tunngassuteqartoq apeqququtillu allat højskolit suliaasaannut tunngassuteqartut Naalakkersuisut folkehøjskolinik kommunillu oqaloqateqarnikkut samminiartarpat tamannalu pissaaq susassaqaarfiit akimorlugit suleqatigiissitamik, folkehøjskolit siunissami inissisimanerisa periarfissaasalu nukittorsarnissaannut siunnersuusiortussanik pilersitsinikkut. Tamassuma inernerisinnaavaa peqataasut akornanni isumaqatigiissusiorneq imaluunniit højskolit pillugit nutaamik inatsisiliorneq.

Naggasiullugu Naalakkersuisut oqallinnissamik siunnersuuteqartoq sammisamik eqqartugassanngortinneranut qutsavigaa højskoleqarnerlu pillugu partiit isumersuutaat soqutiginnittumik malinnaaffigissallugit.

Oqallilluarisi